

縮刻唐石經春秋穀梁傳

上

936
29





春秋穀梁傳序

昔周道衰陵乾綱絕紐禮壞樂崩彝倫攸斁弑逆
篡盜者國有淫縱破義者比肩是以妖災因釁而
作民俗染化而遷陰陽為之愆度七耀為之盈縮
川岳為之崩竭鬼神為之疵厲故父子之恩缺則
小弁之刺作君臣之禮廢則桑扈之諷興夫婦之
道絕則谷風之篇奏骨肉之親離則角弓之怨彰

蒙 卷一
君子之路塞則白駒之詩賦天垂象見吉凶聖作
訓紀成敗欲人君戒慎厥行增脩德政蓋誨爾諄
諄聽我藐藐履霜堅冰所由者漸四夷交侵華戎
同貫幽王以暴虐見禍平王以微弱東遷征伐不
由天子之命號令出自權臣之門故兩觀表而臣
禮亡朱干設而君權喪下陵上替僭逼理極天下
蕩蕩王道盡矣孔子觀滄海之橫流迺喟然而嘆
曰文王既沒文不在茲乎言文王之道喪興之者

在已於是就大師而正雅頌因魯史而脩春秋列
黍離於國風齊王德於邦君所以明其不能復雅
政化不足以被羣后也於時則接乎隱公故因茲
以託始該二儀之化育贊人道之幽變舉得失以
彰黜陟明成敗以著勸誡拯積綱以繼三五鼓芳
風以扇遊塵一字之褒寵踰華袞之贈片言之貶
辱過市朝之撻德之所助雖賤必申義之所抑雖
貴必屈故附勢匿非者無所逃其罪潛德獨運者

無所隱其名信不易之宏軌百王之通典也先王之道既弘麟感化而來應因事備而終篇故絕筆於斯年成天下之事業定天下之邪正莫善於春秋春秋之傳有三而為經之旨一臧否不同褒貶殊致蓋九流分而微言隱異端作而大義乖左氏以鬻拳兵諫為愛君文公納幣為用禮穀梁以衛輒拒父為尊祖不納子糾為內惡公羊以祭仲廢君為行權妾母稱夫人為合正以兵諫為愛君是

人主可得而脅也以納幣為用禮是居喪可得而督也以拒父為尊祖是為子可得而叛也以不納子糾為內惡是仇讎可得而容也以廢君為行權是神器可得而闕也以妾母為夫人是嫡庶可得而齊也若此之類傷教害義不可得強通者也凡傳以通經為主經以必當為理夫至當無二而三傳殊說庸得不弃其所滯擇善而從乎既不俱當則固容俱失若至言幽絕擇善靡從庸得不並舍

以求宗據理以通經乎雖我之所是理未全當安
可以得當之難而自絕於希通哉而漢興以來瓌
望碩儒各信所習是非紛錯準裁靡定故有父子
異同之論石渠分爭之說廢興由於好惡盛衰繼
之辯訥斯蓋非通方之至理誠君子之所歎息也
左氏豔而富其失也巫穀梁清而婉其失也短公
羊辯而裁其失也俗若能富而不巫清而不短裁
而不俗則深於其道者也故君子之於春秋沒身

而已矣升平之末歲次大梁先君北蕃迴軫頓駕
于吳乃帥門生故吏我兄弟子姪研講六籍次及
三傳左氏則有服杜之注公羊則有何嚴之訓釋
穀梁傳者雖近十家皆膚淺末學不經師匠辭理
典據既無可觀又引左氏公羊以解此傳文義違
反斯害也已於是乃商略名例敷陳疑滯博示諸
儒同異之說昊天不弔大山其積匍匐墓次死亡
無日日月逾邁跂及視息乃與二三學士及諸子

弟各記所識并言其意業未及終嚴霜夏墜從弟彫落二子泯沒天實喪予何痛如之今撰諸子之言各記其姓名名曰春秋穀梁傳集解

春秋穀梁傳隱公第一

范甯集解

元年春王正月雖無事必舉正月謹始也公何以不言即位成公志也焉成之言君之不取為公也君之不取為公何也將以讓桓也讓桓正乎曰不

正春秋成人之美不成人之惡隱不正而成之何也將以惡桓也其惡桓何也隱將讓而桓弑之則桓惡矣桓弑而隱讓則隱善矣善則其不正焉何也春秋貴義而不貴惠信道而不信邪孝子揚父之美不揚父之惡先君之欲與桓非正也邪也雖然既勝其邪心以與隱矣已探先君之邪志而遂以與桓則是成父之惡也兄弟天倫也為子受之父為諸侯受之君已廢天倫而忘君父以行小惠

曰小道也。若隱者可謂輕千乘之國，蹈道則未也。三月公及邾儀父盟于昧，及者何？內爲志焉。爾儀字也。父猶傅也。男子之美稱也。其不言邾子何也？邾之上古微，未爵命於周也。不日其盟，渝也。昧地名也。夏五月，鄭伯克段于鄆，克者何能也？何能也？能殺也。何以不言殺？見段之有徒衆也。段，鄭伯弟也。何以知其爲弟也？殺世子母弟，曰君以其目君。知其爲弟也。段，弟也。而弗謂弟，公子也。而弗謂公

子貶之也。段失子弟之道矣。賤段而甚鄭伯也，何甚乎鄭伯？甚鄭伯之處，心積慮成於殺也。于鄆遠也，猶曰取之其母之懷中而殺之云爾。甚之也。然則爲鄭伯者，宜奈何？緩追逸賊，親親之道也。秋七月，天王使宰咺來歸惠公仲子之貽，母以子氏。仲子者，何？惠公之母，孝公之妾也。禮，贈人之母，則可。贈人之妾，則不可。君子以其可辭受之，其志不及事也。贈者何也？乘馬曰貽，衣衾曰襚，貝玉曰含，錢

財曰賻。九月及宋人盟于宿。及者何？內卑者也。宋人外卑者也。卑者之盟不曰宿。邑名也。冬十有二月，祭伯來。來者來朝也。其弗謂朝何也？案內諸侯非有天子之命，不得出會。諸侯不正其外交，故弗與朝也。聘，弓鏃矢不出竟，場束脩之肉不行竟中。有至尊者不貳之也。公子益師卒，大夫曰卒，正也不曰卒，惡也。

二年春公會戎于潛。會者外為主焉。爾知者慮義。

者行仁者，守有此三者，然後可以出會。會戎危公也。夏五月，莒人入向，入者內弗受也。向我邑也。無侯帥師入極，入者內弗受也。極國也。苟焉以入，人為志者，人亦入之矣。不稱氏者，滅同姓貶也。秋八月，庚辰，公及戎盟于唐。九月，紀履緌來，逆女。逆女，親者也。使大夫非正也。以國氏者，為其來交接於我故君子進之也。冬十月，伯姬歸于紀。禮婦人謂嫁曰歸。反曰來歸。從人者也。婦人在家制於父，既

嫁制於夫夫死從長子婦人不專行必有從也伯姬歸于紀此其如專行之辭何也曰非專行也吾伯姬歸于紀故志之也其不言使何也逆之道微無足道焉爾紀子伯莒子盟于密或曰紀子伯莒子而與之盟或曰年同爵同故紀子以伯先也十有二月乙卯夫人子氏薨夫人薨不地夫人者隱之妻也卒而不書葬夫人之義從君者也鄭人伐衛

三年春王二月己巳日有食之言曰不言朝食晦日也其日有食之何也吐者外壤食者內壤闕然不見其壤有食之者也有內辭也或外辭也有食之者內於日也其不言食之者何也知其不可知也三月庚戌天王崩高曰崩厚曰崩尊曰崩天子之崩以尊也其崩之何也以其在民上故崩之其不名何也大上故不名也夏四月辛卯尹氏卒尹氏者何也天子之大夫也外大夫不卒此何以

卒之也於天子之崩為魯主故隱而卒之秋武氏子來求賻武氏子者何也天子之大夫也天子之大夫其稱武氏子何也未畢喪孤未爵未爵使之非正也其不言使何也無君也歸死者曰賻歸生者曰賻曰歸之者正也求之者非正也周雖不求魯不可以不歸魯雖不歸周不可以求之求之為言得不得未可知之辭也交譏之八月庚辰宋公和卒諸侯日卒正也冬十有二月齊侯鄭伯盟于

石門癸未葬宋繆公日葬故也危不得葬也四年春王二月莒人伐杞取牟婁傳曰言伐言取所惡也諸侯相伐取地於是始故謹而志之也戊申衛祝吁弑其君完大夫弑其君以國氏者嫌也弑而代之也夏公及宋公遇于清及者內為志焉爾遇者志相得也宋公陳侯蔡人衛人伐鄭秋翬帥師會宋公陳侯蔡人衛人伐鄭翬者何也公子翬也其不稱公子何也貶之也何為貶之也與于

穀梁卷一
弑公故貶也。九月衛人殺祝吁于濮，稱人以殺殺有罪也。祝吁之挈失嫌也。其月謹之也。于濮者譏失賊也。冬十有二月，衛人立晉衛人者，眾辭也。立者不宜立者也。晉之名惡也。其稱人以立之何也？得眾也得眾則是賢也。賢則其曰不宜立何也？春秋之義，諸侯與正而不與賢也。

五年春，公觀魚于棠。傳曰：常事曰視，非常曰觀。禮尊不親，小事卑不尸。大功魚，卑者之事也。公觀之。

非正也。夏四月，葬衛桓公。月葬，故也。秋，衛師入郟。入者，內弗受也。郟國也。將卑師，眾曰：師九月考仲子之宮，考者何也？考者成之也。成之為夫人也。禮庶子為君，為其母築宮，使公子主其祭也。於子祭於孫，止仲子者，惠公之母隱孫而脩之，非隱也。初獻，六羽初始也。穀梁子曰：舞，夏天子八佾，諸公六佾，諸侯四佾，初獻六羽，始僭樂矣。尸子曰：舞，夏天天子至，諸侯皆用八佾，初獻六羽，始厲樂矣。邾人

鄭人伐宋螟蟲災也甚則月不甚則時冬十有二
月辛巳公子彊卒隱不爵命大夫其曰公子彊何
也先君之大夫也宋人伐鄭圍長葛伐國不言圍
邑此其言圍何也久之也伐不踰時戰不逐奔誅
不填服苞人民毆牛馬曰侵斬樹木壞宮室曰伐
六年春鄭人來輸平輸者隨也平之爲言以道成
也來輸平者不果成也夏五月辛酉公會齊侯盟
于艾秋七月冬宋人取長葛外取邑不志此其志

何也久之也

七年春王三月叔姬歸于紀其不言逆何也逆之道
微無足道焉爾滕侯卒滕侯無名少曰世子長曰
君狄道也其不正者名也夏城中丘城爲保民爲
之也民衆城小則益城益城無極凡城之志皆譏
也齊侯使其弟年來聘諸侯之尊弟兄不得以屬
通其弟云者以其來接於我舉其貴者也秋公伐
邾冬天王使凡伯來聘戎伐凡伯于楚丘以歸凡

伯者何也天子之大夫也國而曰伐此一人而曰
伐何也大天子之命也戎者衛也戎衛者爲其伐
天子之使貶而戎之也楚丘衛之邑也以歸猶愈
乎執也

八年春宋公衛侯遇于垂不期而會曰遇遇者志
相得也三月鄭伯使宛來歸郕名宛所以貶鄭伯
惡與地也庚寅我入郕入者內弗受也日入惡入
者也郕者鄭伯所受命於天子而祭泰山之邑也

夏六月己亥蔡侯考父卒諸侯日卒正也辛亥宿
男卒宿微國也未能同盟故男卒也秋七月庚午
宋公齊侯衛侯盟于瓦屋外盟不日此其日何也
諸侯之參盟於是始故謹而日之也誥誓不及五
帝盟詛不及三王交質子不及二伯八月葬蔡宣
公月葬故也九月辛卯公及莒人盟于包來可言
公及人不可言公及大夫螟冬十有二月無佞卒
無佞之名未有聞焉或曰隱不爵大夫也或說曰

故貶之也

九年春天王使南季來聘南氏姓也季字也聘問也聘諸侯非正也三月癸酉大雨震電震雷也雷霆也庚辰大雨雪志䟽數也八日之間再有大變陰陽錯行故謹而日之也雨月志正也俠卒俠者所俠也弗大夫者隱不爵大夫也隱之不爵大夫何也曰不成爲君也夏城郎秋七月無事焉何以書不遺時也冬公會齊侯于防會者外爲主焉爾

十年春王二月公會齊侯鄭伯于中丘夏翬帥師會齊人鄭人伐宋六月壬戌公敗宋師于管內不言戰舉其大者也辛未取郟辛巳取防取邑不日此其日何也不正其乘敗人而深爲利取二邑故謹而日之也秋宋人衛人入鄭宋人蔡人衛人伐載鄭伯伐取之不正其因人之力而易取之故主其事也冬十月壬午齊人鄭人入邾入者內弗受也日入惡入者也邾國也

十有一年春滕侯薛侯來朝天子無事諸侯相朝
 正也考禮脩德所以尊天子也諸侯來朝時正也
 植言同時也累數皆至也夏五月公會鄭伯于時
 來秋七月壬午公及齊侯鄭伯入許冬十有一月
 壬辰公薨公薨不地故也隱之不忍地也其不言
 葬何也君弑賊不討不書葬以罪下也隱十年無
 正隱不自正也元年有正所以正隱也

春秋穀梁傳卷第一

春秋穀梁傳卷一

春秋穀梁傳桓公第二

范甯集解

元年春王桓無王其曰王何也謹始也其曰無王何也桓弟弒兄臣弒君天子不能定諸侯不能救百姓不能去以為無王之道遂可以至焉爾元年有王所以治桓也正月公即位繼故不言即位正也繼故不言即位之為正何也曰先君不以其道

終則子弟不忍即位也繼故而言即位則是與聞乎弑也繼故而言即位是為與聞乎弑何也曰先君不以其道終己正即位之道而即位是無恩於先君也三月公會鄭伯于垂會者外為主焉爾鄭伯以辟假許田假不言以言以非假也非假而曰假諱易地也禮天子在上諸侯不得以地相與也無田則無許可知矣不言許不與許也許田者魯朝宿之邑也邠者鄭伯之所受命而祭泰山之邑

也用見魯之不朝於周而鄭之不祭泰山也夏四月丁未公及鄭伯盟于越及者內為志焉爾越盟地之名也秋大水高下有水災曰大水冬十月無事焉何以書不遺時也春秋編年四時具而後為年此乃又字益也其不詳者蓋為詳也二年春王正月戊申宋督弑其君與夷桓無王其曰王何也正與夷之卒也及其大夫孔父孔父先死其曰及何也書尊及卑春秋之義也孔父之先

死何也督欲弑君而恐不立於是乎先殺孔父孔父閑也何以知其先殺孔父也曰子既死父不忍稱其名臣既死君不忍稱其名以是知君之累之也孔氏父字謚也或曰其不稱名蓋為祖諱也孔子故宋也滕子來朝三月公會齊侯陳侯鄭伯于稷以成宋亂以者內為志焉爾公為志乎成是亂也此成矣取不成事之辭而加之焉於內之惡而君子無遺焉爾夏四月取郟大鼎于宋戊申納于

大廟桓內弑其君外成人之亂受賂而退以事其祖非禮也其道以周公為弗受也郟鼎者郟之所為也曰宋取之宋也以是為討之鼎也孔子曰名從主人物從中國故曰郟大鼎也秋七月紀侯來朝朝時此其月何也桓內弑其君外成人之亂於是為齊侯陳侯鄭伯計數日以賂己即是事而朝之惡之故謹而月之也蔡侯鄭伯會于鄧九月入杞我入之也公及戎盟于唐冬公至自唐桓無

會而其致何也遠之也

三年春正月公會齊侯于贏夏齊侯衛侯胥命于蒲胥之爲言猶相也相命而信諭謹言而退以是爲近古也是必一人先其以相言之何也不以齊侯命衛侯也六月公會杞侯于成秋七月壬辰朔日有食之既言曰言朔食正朔也既者盡也有繼之辭也公子翬如齊逆女逆女親者也使大夫非正也九月齊侯送姜氏于謹禮送女父不下堂母

不出祭門諸母兄弟不出闕門父戒之曰謹慎從爾舅之言母戒之曰謹慎從爾姑之言諸母般申之曰謹慎從爾父母之言送女踰竟非禮也公會齊侯于謹無譏乎曰爲禮也齊侯來也公之逆而會之可也夫人姜氏至自齊其不言翬之以來何也公親受之于齊侯也子貢曰冕而親迎不已重乎孔子曰合二姓之好以繼萬世之後何謂已重乎冬齊侯使其弟年來聘有年五穀皆熟爲有年

也

四年春正月公狩于郎四時之田皆為宗廟之事也春曰田夏曰苗秋曰蒐冬曰狩四時之田用三焉唯其所先得一為乾豆二為賓客三為克君之庖夏天王使宰渠伯糾來聘

五年春正月甲戌己丑陳侯鮑卒鮑卒何為以二日卒之春秋之義信以傳信疑以傳疑陳侯以甲戌之日出己丑之日得不知死之日故舉二日以

包也夏齊侯鄭伯如紀天王使任叔之子來聘任叔之子者錄父以使子也故微其君臣而著其父子不正父在子代仕之辭也菀并陳桓公城祝丘秋蔡人衛人陳人從王伐鄭舉從者之辭也其舉從者之辭何也為天王諱伐鄭也鄭同姓之國也在乎冀州於是衣服為天子病矣大雩冬蝻冬蝻災也甚則月不甚則時冬州公如曹外相如不書此其書何也過我也

六年春正月寔來寔來者是來也何謂是來謂州公也其謂之是來何也以其畫我故簡言之也諸侯不以過相朝也夏四月公會紀侯于郟秋八月壬午大閱大閱者何閱兵車也脩教明諭國道也平而脩戎事非正也其日以為崇武故謹而日之蓋以觀婦人也蔡人殺陳佗陳佗者陳君也其曰陳佗何也匹夫行故匹夫稱之也其匹夫行奈何陳侯喜獵淫獵于蔡與蔡人爭禽蔡人不知其是

陳君也而殺之何以知其是陳君也兩下相殺不道其不地於蔡也九月丁卯子同生疑故志之時曰同乎人也冬紀侯來朝七年春二月己亥焚咸丘其不言邾咸丘何也疾其以火攻也夏穀伯綏來朝鄧侯吾離來朝其名何也失國也失國則其以朝言之何也嘗以諸侯與之接矣雖失國弗損吾異日也八年春正月己卯烝烝冬事也春興之志不時也

天王使冢父來聘夏五月丁丑烝烝冬事也春夏
興之黷祀也志不敬也秋伐邾冬十月雨雪祭公
來遂逆王后于紀其不言使焉何也不正其以宗
廟之大事即謀於我故弗與使也遂繼事之辭也
其曰遂逆王后故略之也或曰天子無外王命之
則成矣

九年春紀季姜歸于京師為之中者歸之也夏四
月秋七月冬曹伯使其世子射姑來朝朝不言使

言使非正也使世子佞諸侯之禮而來朝曹伯失
正矣諸侯相見曰朝以待人父之道待人之子以
內為失正矣內失正曹伯失正世子可以已矣則
是放命也尸子曰夫已多乎道
十年春王正月庚申曹伯終生卒桓無王其曰王
何也正終生之卒也夏五月葬曹桓公秋公會衛
侯于桃丘弗遇弗遇者志不相得也弗內辭也冬
十有二月丙午齊侯衛侯鄭伯來戰于郎來戰者

前定之戰也內不言戰言戰則敗也不言其人以吾敗也不言及者為內諱也
 十有一年春正月齊人衛人鄭人盟于惡曹夏五月癸未鄭伯寤生卒秋七月葬鄭莊公九月宋人執鄭祭仲宋人者宋公也其曰人何也貶之也突歸于鄭曰突賤之也曰歸易辭也祭仲易其事權在祭仲也死君難臣道也今立惡而黜正惡祭仲也鄭忽出奔衛鄭忽者世子忽也其名失國也柔

會宋公陳侯蔡叔盟于折柔者何吾大夫之未命者也公會宋公于夫鍾冬十有二月公會宋公于闕闕重界也其不姓然也三月葬宣公夏大
 十有二年春正月夏六月壬寅公會紀侯莒子盟于曲池秋七月丁亥公會宋公燕人盟于穀丘八月壬辰陳侯躍卒公會宋公于虛冬十有一月公會宋公于龜丙戌公會鄭伯盟于武父丙戌衛侯晉卒再稱曰決日義也十有二月及鄭師伐宋丁

未戰于宋非與所與伐戰也不言與鄭戰恥不和也於伐與戰敗也內諱敗舉其可道者也

十有三年春二月公會紀侯鄭伯己巳及齊侯宋公衛侯燕人戰齊師宋師衛師燕師敗績其言及者由內及之也其曰戰者由外言之也戰稱人敗稱師重衆也其不地於紀也三月葬衛宣公夏大水秋七月冬十月公會鄭伯于曹無冰無冰時燠十有四年春正月公會鄭伯于曹無冰無冰時燠

也夏五鄭伯使其弟禦來盟諸侯之尊弟兄不得以屬通其弟云者以其來我舉其貴者也來盟前定也不日前定之盟不曰孔子曰聽遠音者聞其疾而不聞其舒望遠者察其貌而不察其形立乎定哀以指隱桓隱桓之日遠矣夏五傳疑也秋八月壬申御廩災乙亥嘗御廩之災不志此其志何也以為唯未易災之餘而嘗可也志不敬也天子親耕以共粢盛王后親蠶以共祭服國非無良農

工女也以為人之所盡事其祖禰不若以己所自親者也何用見其未易災之餘而嘗也曰甸粟而內之三宮三宮米而藏之御廩夫嘗必有兼甸之事焉壬申御廩災乙亥嘗以為未易災之餘而嘗也冬十有二月丁巳齊侯祿父卒宋人以齊人祭人衛人陳人伐鄭以者不以者也民者君之本也使人以其死非正也其來於齊者亦不盟而十有五年春二月天王使冢父來求車古者諸侯

時獻于天子以其國之所有故有辭讓而無徵求求車非禮也求金甚矣三月乙未天王崩夏四月己巳葬齊僖公五月鄭伯突出奔蔡譏奪正也鄭世子忽復歸于鄭反正也許叔入于許許叔許之貴者也莫宜乎許叔其曰入何也其歸之道非所以歸也公會齊侯于蒿邾人年人葛人來朝秋九月鄭伯突入于櫟冬十有一月公會宋公衛侯陳侯于袤伐鄭地而後伐疑辭也非其疑也

十有六年春正月公會宋公蔡侯衛侯于曹夏四月公會宋公衛侯陳侯蔡侯伐鄭秋七月公至自伐鄭桓無會其致何也危之也冬城向十有一月衛侯朔出奔齊朔之名惡也天子召而不往也十有七年春正月丙辰公會齊侯紀侯盟于黃二月丙午公及邾儀父盟于趯夏五月丙午及齊師戰于郎內諱敗舉其可道者也不言其人以吾敗也不言及之者為內諱也六月丁丑蔡侯封人卒

秋八月蔡季自陳歸于蔡蔡季蔡之貴者也自陳陳有奉焉爾癸巳葬蔡桓侯及宋人衛人伐邾冬十月朔日有食之言朔不言日食既朔也

十有八年春王正月公會齊侯于濼公夫人姜氏遂如齊濼之會不言及夫人何也以夫人之伉弗稱數也夏四月丙子公薨于齊其地於外也薨稱公舉上也丁酉公之喪至自齊秋七月冬十有二月己丑葬我君桓公葬我君接上下也君弑賊

不討不書葬此其言葬何也不責踰國而討于是也桓公葬而後舉謚謚所以成德也於卒事乎加之矣知者慮義者行仁者守有此三者備然後可以會矣

春秋穀梁傳卷第二

春秋穀梁傳莊公第三

范甯集解

元年春王正月繼弑君不言即位正也繼弑君不言即位之為正何也曰先君不以其道終則子不忍即位也三月夫人孫于齊孫之為言猶孫也諱奔也接練時錄母之變始人之也不言氏姓貶之也人之於天也以道受命於人也以言受命不若

於道者天絕之也不若於言者人絕之也臣子大受命夏單伯逆王姬單伯者何吾大夫之命乎天子者也命大夫故不名也其不言如何也其義不可受於京師也其義不可受於京師何也曰躬君弒於齊使之主婚姻與齊爲禮其義固不可受也秋築王姬之館于外築禮也于外非禮也築之爲禮何也主王姬者必自公門出於廟則已尊於寢則已卑爲之築節矣築之外變之正也築之外變

之爲正何也仇讎之人非所以接婚姻也衰麻非所以接弁冕也其不言齊侯之來逆何也不使齊侯得與吾爲禮也冬十月乙亥陳侯林卒諸侯曰卒正也王使榮叔來錫桓公命禮有受命無來錫命錫命非正也生服之死行之禮也生不服死追錫之不正甚矣王姬歸于齊爲之中者歸之也齊師遷紀邾郚郕紀國也邾郚郕國也或曰遷紀于邾郚郕

二年春王二月葬陳莊公夏公子慶父帥師伐於
餘丘國而曰伐於餘丘邾之邑也其曰伐何也公
子貴矣師重矣而敵人之邑公子病矣病公子所
以譏乎公也其一曰君在而重之也秋七月齊王
姬卒爲之主者卒之也冬十有二月夫人姜氏會
齊侯于禚婦人既嫁不踰竟踰竟非正也婦人不
言會言會非正也鄉食甚矣乙酉宋公馮卒
三年春王正月溺會齊師伐衛溺者何也公子溺

也其不稱公子何也惡其會仇讎而伐同姓故貶
而名之也夏四月葬宋莊公月葬故也五月葬桓
王傳曰改葬也改葬之禮總舉下緬也或曰卻尸
以求諸侯天子志崩不志葬必其時也何必焉舉
天下而葬一人其義不疑也志葬故也危不得葬
也曰近不失崩不志崩失天下也獨陰不生獨陽
不生獨天不生三合然後生故曰母之子也可天
之子也可尊者取尊稱焉卑者取卑稱焉其曰王

者民之所歸往也秋紀季以鄆入于齊鄆紀之邑也入于齊者以鄆事齊也入者內弗受也冬公次于郎次止也有畏也欲救紀而不能也四年春王二月夫人姜氏饗齊侯于祝丘饗甚矣鄉食齊侯所以病齊侯也三月紀伯姬卒外夫人不卒此其言卒何也吾女也適諸侯則尊同以吾爲之變卒之也夏齊侯陳侯鄭伯遇于垂紀侯大去其國大去者不遺一人之辭也言民之從者四年

而後畢也紀侯賢而齊侯滅之不言滅而曰大去其國者不使小人加乎君子六月乙丑齊侯葬紀伯姬外夫人不書葬此其書葬何也吾女也失國故隱而葬之秋七月冬公及齊人狩于郟齊人者齊侯也其曰人何也卑公之敵所以卑公也何爲卑公也不復讎而怨不釋刺釋怨也五年春王正月夏夫人姜氏如齊師師而曰如衆也婦人旣嫁不踰竟踰竟非禮也秋郟黎來來朝

郟國也黎來微國之君未爵命者也冬公會齊人
宋人陳人蔡人伐衛是齊侯宋公也其曰人何也
人諸侯所以人公也其人公何也逆天王之命也
六年春王三月王人子突救衛王人卑者也稱名
貴之也善救衛也救者善則伐者不正矣夏六月
衛侯朔入于衛其不言伐衛納朔何也不逆天王
之命也入者內弗受也何用弗受也爲以王命絕
之也朔之名惡也朔入逆則出順矣朔出入名以

王命絕之也秋公至自伐衛惡事不致此其致何
也不致則無用見公之惡事之成也螟冬齊人來
歸衛寶以齊首之分惡於齊也使之如下齊而來
我然惡戰則殺矣
七年春夫人姜氏會齊侯于防婦人不會會非正
也夏四月辛卯昔恒星不見恒星者經星也日入
至於星出謂之昔不見者可以見也夜中星隕如
雨其隕也如雨是夜中與春秋著以傳著疑以傳

疑中之幾也。而曰夜中著焉，爾何用見其中也？失變而錄其時，則夜中矣。其不曰恒星之隕何也？我知恒星之不見而不知其隕也。我見其隕而接於地者，則是雨說也。著於上見於下，謂之雨著於下，不見於上，謂之隕。豈雨說哉？秋大水，高下有水災，曰大水無麥，苗麥苗同時也。冬夫人姜氏會齊侯于穀，婦人不會，會非正也。

八年春，王正月，師次于郎，以俟陳人、蔡人，次止也。侯待也。甲午，治兵，出曰治兵，習戰也。入曰振旅，習戰也。治兵而陳，蔡不至矣。兵事以嚴終，故曰善陳者不戰，此之謂也。善為國者不師，善師者不陳，善陳者不戰，善戰者不死，善死者不亡。夏，師及齊師，圍郕，郕降于齊師。其曰降于齊師，何不使齊師加威於郕也？秋，師還，還者事未畢也。遯也。冬，十有一月癸未，齊無知弒其君諸兒，大夫弒其君以國氏者，嫌也。弒而代之也。

九年春齊人殺無知無知之挈失嫌也稱人以殺大夫殺有罪也公及齊大夫盟于暨公不及大夫大夫不名無君也盟納子糾也不曰其盟渝也當齊無君制在公矣當可納而不納故惡內也夏公伐齊納糾當可納而不納齊變而後伐故乾時之戰不諱敗惡內也齊小白入于齊大夫出奔反以好曰歸以惡曰入齊公孫無知弑襄公公子糾公子小白不能存出亡齊人殺無知而迎公子糾於

魯公子小白不讓公子糾先入又殺之于魯故曰齊小白入于齊惡之也秋七月丁酉葬齊襄公八月庚申及齊師戰于乾時我師敗績九月齊人取子糾殺之外不言取言取病內也取易辭也猶曰取其子糾而殺之云爾十室之邑可以逃難百室之邑可以隱死以千乘之魯而不能存子糾以公為病矣冬浚洙浚洙者深洙也著力不足也十年春王正月公敗齊師于長勺不曰疑戰也疑

戰而曰敗勝內也。二月公侵宋。侵時此其月何也。乃深其怨於齊。又退侵宋。以衆其敵惡之。故謹而月之。三月宋人遷宿。遷亡辭也。其不地宿不復見也。遷者猶未失其國家以往者也。夏六月齊師宋師次于郎。次止也。畏我也。公敗宋師于乘丘。不曰疑戰也。疑戰而曰敗勝內也。秋九月荆敗蔡師于莘。以蔡侯獻武歸。荆者楚也。何爲謂之荆狄之也。何爲狄之。聖人立必後。至天子弱必先叛。故曰荆

狄之也。蔡侯何以名也。絕之也。何爲絕之。獲也。中國不言敗。此其言敗何也。中國不言敗。蔡侯其見獲乎。其言敗何也。釋蔡侯之獲也。以歸猶愈乎。執也。冬十月齊師滅譚。譚子奔莒也。十有一年春王正月夏五月戊寅公敗宋師于鄆。內事不言戰。舉其大者。其日成敗之也。宋萬之獲也。秋宋大水。外災不書。此何以書。王者之後也。高下有水災。曰大水。冬王姬歸于齊。其志過我也。

十有二年春王三月紀叔姬歸于鄫國而曰歸此
邑也其曰歸何也吾女也失國喜得其所故言歸
焉爾夏四月秋八月甲午宋萬弑其君捷宋萬宋
之卑者也卑者以國氏及其大夫仇牧以尊及卑
也仇牧閑也冬十月宋萬出奔陳

十有三年春齊人宋人陳人蔡人邾人會于北杏
是齊侯宋公也其曰人何也始疑之何疑焉桓非
受命之伯也將以事授之者也曰可矣乎未乎舉

人眾之辭也夏六月齊人滅遂遂國也其不曰微
國也秋七月冬公會齊侯盟于柯曹劓之盟也信
齊侯也桓盟雖內與不日信也

十有四年春齊人陳人曹人伐宋夏單伯會伐宋
會事之成也秋七月荆入蔡荆者楚也其曰荆何
也州舉之也州不如國國不如名名不如字冬單
伯會齊侯宋公衛侯鄭伯于鄆復同會也
十有五年春齊侯宋公陳侯衛侯鄭伯會于鄆復

同會也夏夫人姜氏如齊婦人既嫁不踰竟踰竟非禮也秋宋人齊人邾人伐郕鄭人侵宋冬十月十有六年春王正月夏宋人齊人衛人伐鄭秋荆伐鄭冬十有二月會齊侯宋公陳侯衛侯鄭伯許男曹伯滑伯滕子同盟于幽同者有同也同尊周也不言公外內寮一疑之也邾子克卒其日子進之也

十有七年春齊人執鄭詹人者衆辭也以人執與

之辭也鄭詹鄭之卑者卑者不志此其志何也以其逃來志之也逃來則何志焉將有其末不得不錄其本也鄭詹鄭之佞人也夏齊人殲于遂殲者盡也然則何為不言遂人盡齊人也無遂之辭也無遂則何為言遂其猶存遂也存遂奈何曰齊人滅遂使人戍之遂之因氏飲戍者酒而殺之齊人殲焉此謂狎敵也秋鄭詹自齊逃來逃義曰逃冬多麋

十有八年春王三月日有食之不言日不言朔夜食也何以知其夜食也曰王者朝日故雖為天子必有尊也貴為諸侯必有長也故天子朝日諸侯朝朔夏公追戎于濟西其不言戎之伐我何也以公之追之不使戎邇於我也于濟西者大之也何大焉為公之追之也秋有彘一有一亡曰有彘射人者也冬十月

十有九年春王正月夏四月秋公子結媵陳人之

婦于鄆遂及齊侯宋公盟媵淺事也不志此其志何也辟要盟也何以見其辟要盟也媵禮之輕者也盟國之重也以輕事遂乎國重無說其曰陳人之婦略之也其不日數渝惡之也夫人姜氏如莒婦人既嫁不踰竟踰竟非正也冬齊人宋人陳人伐我西鄙其曰鄙遠之也其遠之何也不以難邇我國也

廿年春王二月夫人姜氏如莒婦人既嫁不踰竟

踰竟非正也夏齊大災其志以甚也秋七月冬齊人伐我

廿有一年春王正月夏五月辛酉鄭伯突卒秋七月戊戌夫人姜氏薨婦人弗目也冬十有二月葬鄭厲公其不曰嬖也廿有二年春王正月肆大眚肆失也眚災也災紀也失故也為嫌天子之葬也癸丑葬我小君文姜小君非君也其曰君何也以其為公配可以言小

君也陳人殺其公子禦寇言公子而不言大夫公子未命為大夫也其曰公子何也公子之重視大夫命以執公子夏五月秋七月丙申及齊高偃盟于防不言公高偃伉也冬公如齊納幣納幣大夫之事也禮有納采有問名有納徵有告期四者備而後娶禮也公之親納幣非禮也故譏之善果廿有三年春公至自齊祭叔來聘其不言使何也天子之內臣也不正其外交故不與使也夏公如

齊觀社常事曰視非常曰觀觀無事之辭也以是
為尸女也無事不出竟公至自齊公如往時正也
致月故也如往月致月有懼焉爾荆人來聘善累
而後進之其曰人何也舉道不待再公及齊侯遇
于穀及者內為志焉爾遇者志相得也蕭叔朝公
微國之君未爵命者其不言來於外也朝於廟正
也於外非正也秋丹桓宮楹禮天子諸侯黜聖大
夫倉士黜丹楹非禮也冬十有一月曹伯射姑卒

十有二月甲寅公會齊侯盟于扈
廿有四年春王三月刻桓宮桷禮天子之桷斲之
龍石之加密石焉諸侯之桷斲之龍石之大夫斲之士
斲本刻桷非正也夫人所以崇宗廟也取非禮與
非正而加之於宗廟以飾夫人非正也刻桓宮桷
丹桓宮楹斥言桓宮以惡莊也葬曹莊公夏公如
齊逆女親迎恒事也不志此其志何也不正其親
迎於齊也秋公至自齊迎者行見諸舍見諸先至

非正也八月丁丑夫人姜氏入者內弗受也日入惡入者也何用不受也以宗廟弗受也其以宗廟弗受何也娶仇人子弟以薦舍於前其義不可受也戊寅大夫宗婦覲用幣覲見也禮大夫不見夫人不言及不正其行婦道故列數之也男子之贄羔鴈雉牯婦人之贄束栗鍛脩用幣非禮也用者不冝用者也大夫國體也而行婦道惡之故謹而日之也大水冬戎侵曹曹羈出奔陳赤歸于曹

郭公赤蓋郭公也何為名也禮諸侯無外歸之義外歸非正也

廿有五年春陳侯使女叔來聘其不名何也天子之命大夫也夏五月癸丑衛侯朔卒六月辛未朔日有食之言日言朔食正朔也鼓用牲于社鼓禮也用牲非禮也天子救日置五麾陳五兵五鼓諸侯置三麾陳三鼓三兵大夫擊門士擊柝言充其陽也伯姬歸于杞其不言逆何也逆之道微無足

道焉爾秋大水鼓用牲于社于門高下有水災曰大水既戒鼓而駭衆用牲可以已矣救日以鼓兵救水以鼓衆冬公子友如陳
廿有六年春公伐莒夏公至自伐莒曹殺其大夫言大夫而不稱名姓無命大夫也無命大夫而曰大夫賢也爲曹羈崇也秋公會宋人齊人伐徐冬十有二月癸亥朔日有食之

廿有七年春公會杞伯姬于洮夏六月公會齊侯

宋公陳侯鄭伯同盟于幽同者有同也同尊周也於是而後授之諸侯也其授之諸侯何也齊侯得衆也桓會不致安之也桓盟不日信之也信其信仁其仁衣裳之會十有一未嘗有歃血之盟也信厚也兵車之會四未嘗有大戰也愛民也秋公子友如陳葬原仲言葬不言卒不葬者也不葬而曰葬諱出奔也冬杞伯姬來莒慶來逆叔姬諸侯之嫁子於大夫主大夫以與之來者接內也不正其

接內故不與夫婦之稱也杞伯來朝公會齊侯于城濮

廿有八年春王三月甲寅齊人伐衛衛人及齊人戰衛人敗績於伐與戰安戰也戰衛戰則是師也其曰人何也微之也何為微之也今授之諸侯而後有侵伐之事故微之也其人衛何也以其人齊不可不人衛也衛小齊大其以衛及之何也以其微之可以言及也其稱人以敗何也不以師敗於

人也夏四月丁未邾子瑣卒秋荆伐鄭荆者楚也其曰荊州舉之也公會齊人宋人救鄭善救鄭也冬築微山林藪澤之利所以與民共也虞之非正也大無麥禾大者有顧之辭也於無禾及無麥也臧孫辰告糴于齊國無三年之畜曰國非其國也一年不外告糴諸侯告請也糴糴也不正故舉臧孫辰以為私行也國無九年之畜曰不足無六年之畜曰急無三年之畜曰國非其國也諸侯無粟

諸侯相歸粟正也。臧孫辰告糴于齊，告然後與之。言內之無外交也。古者稅什一，豐年補敗，不外求而上下皆足也。雖累凶年，民弗病也。一年不艾而百姓饑，君子非之，不言如爲內諱也。十有九年春，新延廩，延廩者法廩也。其言新有故也。有故則何爲書也。古之君人者，必時視民之所勤，民勤於力則功築，罕民勤於財則貢賦，少民勤於食則百事廢矣。冬築微，春新延廩，以其用民力。

爲已悉矣。夏鄭人侵許，秋有蜚，一有一亡，曰有冬十有二月，紀叔姬卒，城諸及防，可城也。以大及小也。十有二年春，王正月，夏師次于成，次止也。有畏也。欲救鄆而不能也。不言公恥不能救鄆也。秋七月，齊人降鄆，降猶下也。鄆，紀之遺邑也。八月癸亥，葬紀叔姬，不日卒而日葬，閔紀之亡也。九月庚午，朔日有食之，鼓用牲于社。冬，公及齊侯遇于魯濟，及者內。

為志焉爾遇者志相得也齊人伐山戎齊人者齊侯也其曰人何也愛齊侯乎山戎也其愛之何也桓內無因國外無從諸侯而越千里之險北伐山戎危之也則非之乎善之也何善乎爾燕周之分子也貢職不至山戎為之伐矣

卅有一年春築臺于郎夏四月薛伯卒築臺于薛六月齊侯來獻戎捷齊侯來獻捷者內齊侯也不言使內與同不言使也獻戎捷軍得曰捷戎菽也

秋築臺于秦不正罷民三時虞山林藪澤之利且財盡則怨力盡則懟君子危之故謹而志之也或曰倚諸桓也桓外無諸侯之變內無國事越千里之險北伐山戎為燕辟地魯外無諸侯之變內無國事一年罷民三時虞山林藪澤之利惡內也冬不雨

卅有二年春城小穀夏宋公齊侯遇于梁丘遇者志相得也梁丘在曹邾之間去齊八百里非不能

從諸侯而往也辭所遇遇所不遇大齊桓也秋七月癸巳公子牙卒八月癸亥公薨于路寢路寢正寢也寢疾居正寢正也男子不絕于婦人之手以齊終也冬十月乙未子般卒子卒日正也不日故也有所見則日公子慶父如齊此奔也其曰如何也諱莫如深深則隱苟有所見莫如深也狄伐邢

春秋穀梁卷第三

春秋穀梁傳閔公第四

范甯集解


元年春王正月繼弑君不言即位正也親之非父也尊之非君也繼之如君父也者受國焉爾齊人救邢善救邢也夏六月辛酉葬我君莊公莊公葬而後舉謚謚所以成德也於卒事乎加之矣秋八月公及齊侯盟于洛姑盟納季子也季子來歸其

春秋穀梁卷第四
曰季子貴之也其曰來歸喜之也冬齊仲孫來其
曰齊仲孫外之也其不目而曰仲孫疏之也其言
齊以累桓也

二年春王正月齊人遷陽夏五月乙酉吉禘于莊
公吉禘者不吉者也喪事未畢而舉吉祭故非之
也秋八月辛丑公薨不地故也其不書葬不以討
母葬于也九月夫人姜氏孫于邾孫之為言猶孫
也諱奔也公子慶父出奔莒其曰出絕之也慶父

不復見矣冬齊高子來盟其曰來喜之也其曰高
子貴之也盟立僖公也不言使何也不以齊侯使
高子也十有二月狄入衛鄭弃其師惡其長也兼
不反其衆則是弃其師也

春秋穀梁卷第四



春秋穀梁傳僖公第五

范甯集解

元年春王正月繼弒君不言即位正也齊師宋師曹師次于聶北救邢救不言次言次非救也非救而曰救何也遂齊侯之意也是齊侯與齊侯也何用見其是齊侯也曹無師曹師者曹伯也其不言曹伯何也以其不言齊侯不可言曹伯也其不言

齊侯何也以其不足乎揚不言齊侯也夏六月邢
遷于夷儀遷者猶得其國家以往者也其地邢復
見也齊師宋師曹師城邢是向之師也使之如改
事然美齊侯之功也秋七月戊辰夫人姜氏薨于
夷夫人薨不地地故也齊人以歸不言以喪歸非
以喪歸也加喪焉諱以夫人歸也其以歸薨之也
楚人伐鄭八月公會齊侯宋公鄭伯曹伯邾人于
榿九月公敗邾師于偃不日疑戰也疑戰而曰敗

勝內也冬十月壬午公子友帥師敗莒師于麗獲
莒挈莒無大夫其曰莒挈何也以吾獲之目之也
內不言獲此其言獲何也惡公子之給給者奈何
公子友謂莒挈曰吾二人不相說士卒何罪屏左
右而相搏公子友處下左右曰孟勞孟勞者魯之
寶刀也公子友以殺之然則何以惡乎給也曰弃
師之道也十有二月丁巳夫人氏之喪至自齊其
不言姜以其殺二子貶之也或曰為齊桓諱殺同

姓也

二年春王正月城楚丘楚丘者何衛邑也國而曰城此邑也其曰城何也封衛也則其不言城衛何也衛未遷也其不言衛之遷焉何也不與齊侯專封也其言城之者專辭也故非天子不得專封諸侯諸侯不得專封諸侯雖通其仁以義而不與也故曰仁不勝道夏五月辛巳葬我小君哀姜虞師晉師滅夏陽非國而曰滅重夏陽也虞無師其曰

師何也以其先晉不可以不言師也其先晉何也為主乎滅夏陽也夏陽者虞虢之塞邑也滅夏陽而虞虢舉矣虞之為主乎滅夏陽何也晉獻公欲伐虢荀息曰君何不以屈產之乘垂棘之璧而借道乎虞也公曰此晉國之寶也如受吾幣而不借吾道則如之何荀息曰此小國之所以事大國也彼不借吾道必不敢受吾幣如受吾幣而借吾道則是我取之中府而藏之外府取之中廢而置之

外殿也。公曰：宮之竒存焉，必不使受之也。荀息曰：宮之竒之爲人也，達心而懦，又少長於君，達心則其言略，懦則不能彊諫，少長於君則君輕之，且夫玩好在耳目之前，而患在一國之後，此中知以上乃能慮之。臣料虞君中知以下也。公遂借道而伐虢。宮之竒諫曰：晉國之使者其辭卑而幣重，必不使於虞。虞公弗聽，遂受其幣而借之。道宮之竒諫曰：語曰：唇亡則齒寒，其斯之謂與！挈其妻子以奔

曹獻公亡。虢五年而後舉。虞荀息牽馬操辭而前曰：辭則猶是也，而馬齒加長矣。秋九月，齊侯宋公、江人、黃人盟于貫貫之盟。不期而至者，江人、黃人也。江人、黃人者，遠國之辭也。中國稱齊、宋，遠國稱江、黃，以爲諸侯皆來至也。冬十月，不雨，不雨者勤雨也。楚人侵鄭。而陳、許、蔡皆論之。三年春，王正月，不雨，不雨者勤雨也。夏四月，不雨，一時言不雨者，閔雨也。閔雨者，有志乎民者也。徐

人取舒六月雨雨云者喜雨也喜雨者有志乎民者也秋齊侯宋公江人黃人會于陽穀陽穀之會桓公委端摺笏而朝諸侯諸侯皆諭乎桓公之志冬公子季友如齊蒞盟蒞者位也其不日前定也不言及者以國與之也不言其人亦以國與之也楚人伐鄭

四年春王正月公會齊侯宋公陳侯衛侯鄭伯許男曹伯侵蔡蔡潰潰之為言上下不相得也侵淺

事也侵蔡而蔡潰以桓公為知所侵也不土其地不分其民明正也遂伐楚次于陘遂繼事也次止也夏許男新臣卒諸侯死於國不地死於外地死於師何為不地內桓師也楚屈完來盟于師盟于召陵楚無大夫其曰屈完何也以其來會桓成之為大夫也其不言使權在屈完也則是正乎曰非正也以其來會諸侯重之也來者何內桓師也于師前定也于召陵得志乎桓公也得志者不得志

也。以桓公得志為僅矣。屈完曰：大國之以兵向楚，何也？桓公曰：昭王南征，不反。菁茅之貢不至，故周室不祭。屈完曰：菁茅之貢不至，則諾。昭王南征，不反。我將問諸江、齊人執陳轅濤塗齊人者，齊侯也。其人之何也？於是哆然外齊侯，也不正其踰國而執也。秋及江，人黃人伐陳，不言其人及之者，何？內師也。八月，公至，自伐楚有二事：偶則以後事致，後事小則以先事致。其以伐楚致，大伐楚也。葬許穆。

公冬十有二月，公孫茲帥師會齊人、宋人、衛人、鄭人、許人，曹人侵陳。
五年春，晉侯殺其世子申生。目晉侯，斥殺惡。晉侯也。杞伯姬來朝。其子婦人既嫁，不踰竟。踰竟非正也。諸侯相見曰：朝伯姬為志乎朝其子也。伯姬為志乎朝其子，則是杞伯失夫之道矣。諸侯相見曰：朝以待人父之道，待人之子，非正也。故曰：杞伯姬來朝其子，參譏也。夏，公孫茲如牟。公及齊侯、宋公。

陳侯衛侯鄭伯許男曹伯會王世子于首戴及以會尊之也何尊焉王世子云者唯王之貳也云可以重之存焉尊之也何重焉天子世子世天下也秋八月諸侯盟于首戴無中事而復舉諸侯何也尊王世子而不敢與盟也尊則其不敢與盟何也盟者不相信也故謹信也不敢以所不信而加之尊者桓諸侯也不能朝天子是不臣也王世子子也塊然受諸侯之尊己而立乎其位是不子也桓

不臣王世子不子則其所善焉何也是則變之正也天子微諸侯不享覲桓控大國扶小國統諸侯不能以朝天子亦不敢致天王尊王世子于首戴乃所以尊天王之命也世子含王命會齊桓亦所以尊天王之命也世子受之可乎是亦變之正也天子微諸侯不享覲世子受諸侯之尊己而天王尊矣世子受之可也鄭伯逃歸不盟以其去諸侯故逃之也楚人滅弦弦子奔黃弦國也其不日微

國也。九月戊申朔日有食之。冬，晉人執虞公。執不言所於地，緼於晉也。其曰公何也？猶曰其下執之之辭也。其猶下執之之辭何也？晉命行乎虞民矣。虞虢之相救，非相為賜也。今日亡虢而明日亡虞矣。

六年春，王正月，夏公會齊侯、宋公、陳侯、衛侯、曹伯，伐鄭，圍新城。伐國不言圍邑，此其言圍何也？病鄭也。著鄭伯之罪也。秋，楚人圍許，諸侯遂救許。善救

許也。冬，公至自伐鄭，其不以救許致何也？大伐鄭也。

七年春，齊人伐鄭，夏小邾子來朝，鄭殺其大夫申侯，稱國以殺大夫，殺無罪也。秋七月，公會齊侯、宋公、陳世子款、鄭世子華，盟于寧母。衣裳之會也。曹伯班卒。公子友如齊。冬，葬曹昭公。

八年春，王正月，公會王人、齊侯、宋公、衛侯、許男、曹伯、陳世子款，盟于洮。王人之先，諸侯何也？貴王命。

也朝服雖敝必加於上弁冕雖舊必加於首周室
雖衰必先諸侯兵車之會也鄭伯乞盟以向之逃
歸乞之也乞者重辭也重是盟也乞者處其所而
請與也蓋洵之也夏狄伐晉秋七月禘于大廟用
致夫人用者不宜用者也致者不宜致者而言夫
人必以其氏姓言夫人而不以氏姓非夫人也立
妾之辭也非正也夫人之我可以不夫人之乎夫
人卒葬之我可以不卒葬之乎一則以宗廟臨之

而後貶焉一則以外之弗夫人而見正焉冬十有
二月丁未天王崩

九年春王三月丁丑宋公禦說卒夏公會宰周公
齊侯宋子衛侯鄭伯許男曹伯于葵丘天子之宰
通于四海宋其稱子何也未葬之辭也禮柩在堂
上孤無外事今背殯而出會以宋子為無哀矣秋
七月乙酉伯姬卒內女也未適人不卒此何以卒
也許嫁筭而字之死則以成人之喪治之九月戊

辰諸侯盟于葵丘桓盟不日此何以日美之也為
見天子之禁故備之也葵丘之盟陳牲而不殺讀
書加于牲上壹明天子之禁曰毋雍泉毋訖糴毋
易樹子毋以妾為妻毋使婦人與國事甲子晉侯
詭諸卒冬晉里克殺其君之子奚齊其君之子云
者國人不子也國人不子何也不正其殺世子申
生而立之也

十年春王正月公如齊狄滅溫溫子奔衛晉里克

弒其君卓及其大夫荀息以尊及卑也荀息閑也
夏齊侯許男伐北戎晉殺其大夫里克稱國以殺
罪累上也里克弒二君與一大夫其以累上之辭
言之何也其殺之不以其罪也其殺之不以其罪
奈何里克所為弒者為重耳也夷吾曰是又將殺
我乎故殺之不以其罪也其為重耳弒奈何晉獻
公伐虢得麗姬獻公私之有二子長曰奚齊稚曰
卓子麗姬欲為亂故謂君曰吾夜者夢夫人趨而

來曰吾苦畏胡不使大夫將衛士而衛冢乎公曰孰可使曰臣莫尊於世子則世子可故君謂世子曰麗姬夢夫人趨而來曰吾苦畏女其將衛士而往衛冢乎世子曰敬諾築宮宮成麗姬又曰吾夜者夢夫人趨而來曰吾苦飢世子之宮已成則何為不使祠也故獻公謂世子曰其祠世子祠已祠致福於君君田而不在麗姬以醎為酒藥脯以毒獻公田來麗姬曰世子已祠故致福於君君將食

麗姬跪曰食自外來者不可不試也覆酒於地而地賁以脯與犬犬死麗姬下堂而啼呼曰天乎天乎國子之國也子何遲於為君君喟然歎曰吾與女未有過切是何與我之深也使人謂世子曰爾其圖之世子之傅里克謂世子曰入自明入自明則可以生不入自明則不可以生世子曰吾君已老矣已昏矣吾若此而入自明則麗姬必死麗姬死則吾君不安所以使吾君不安者吾不若自死

吾寧自殺以安吾君以重耳為寄矣刎脰而死故
里克所為弑者為重耳也夷吾曰是又將殺我也
秋七月冬大雨雪
十有一年春晉殺其大夫平鄭父稱國以殺罪累
上也夏公及夫人姜氏會齊侯于陽穀秋八月大
雩雩月正也雩得雨曰雩不得雨曰旱冬楚人伐
黃
十有二年春王三月庚午日有食之夏楚人滅黃

貫之盟管仲曰江黃遠齊而近楚楚為利之國也
若伐而不能救則無以宗諸侯矣桓公不聽遂與
之盟管仲死楚伐江滅黃桓公不能救故君子閔
之也秋七月冬十有二月丁丑陳侯杵臼卒
十有三年春狄侵衛夏四月葬陳宣公公會齊侯
宋公陳侯衛侯鄭伯許男曹伯于鹹兵車之會也
秋九月大雩冬公子友如齊
十有四年春諸侯城緣陵其曰諸侯散辭也聚而

曰散何也諸侯城有散辭也桓德衰矣夏六月季
姬及繒子遇于防使繒子來朝遇者同謀也來朝
者來請己也朝不言使言使非正也以病繒子也
秋八月辛卯沙鹿崩林屬於山為鹿沙山名也無
崩道而崩故志之也其日重其變也狄侵鄭冬蔡
侯盱卒諸侯時卒惡之也
十有五年春王正月公如齊楚人伐徐三月公會
齊侯宋公陳侯衛侯鄭伯許男曹伯盟于牡丘兵

車之會也遂次于匡遂繼事也次止也有畏也公
孫敖帥師及諸侯之大夫救徐善救徐也夏五月
日有食之秋七月齊師曹師伐厲八月及蝻及蝗災
也甚則月不甚則時九月公至自會季姬歸于繒
己卯晦震夷伯之廟晦冥也震雷也夷伯魯大夫
也因此以見天子至于士皆有廟天子七廟諸侯
五大夫三士二故德厚者流光德薄者流卑是以
貴始德之本也始封必為祖冬宋人伐曹楚人敗

徐于婁林夷狄相敗志也十有一月壬戌晉侯及秦伯戰于韓獲晉侯韓之戰晉侯失民矣以其民未敗而君獲也

十有六年春王正月戊申朔隕石于宋五先隕而後石何也隕而後石也于宋四竟之內曰宋後數散辭也耳治也是月六鷦退飛過宋都是月者決不日而月也六鷦退飛過宋都先數聚辭也目治也子曰石無知之物鷦微有知之物石無知故曰

之鷦微有知之物故月之君子之於物無所苟而已石鷦且猶盡其辭而況於人乎故五石六鷦之辭不設則王道不亢矣民所聚曰都三月壬申公子季友卒大夫曰卒正也稱公弟叔仲賢也大夫不言公子公孫䟽之也夏四月丙申繒季姬卒秋七月甲子公孫茲卒大夫曰卒正也冬十有二月公會齊侯宋公陳侯衛侯鄭伯許男邾侯曹伯于淮兵車之會也

十有七年春齊人徐人伐英氏夏滅項孰滅之桓公也何以不言桓公也為賢者諱也項國也不可滅而滅之乎桓公知項之可滅也而不知己之不可以滅也既滅人之國矣何賢乎君子惡惡疾其始善善樂其終桓嘗有存亡繼絕之功故君子為之諱也秋夫人姜氏會齊侯于卞九月公至自會冬十有二月乙亥齊侯小白卒此不正其日之何也其不正前見矣其不正之前見何也以不正入

虛國故稱嫌焉爾

十有八年春王正月宋公曹伯衛人邾人伐齊非伐喪也夏師救齊善救齊也五月戊寅宋師及齊師戰于甌齊師敗績戰不言伐客不言及言及惡宋也狄救齊善救齊也秋八月丁亥葬齊桓公冬邢人狄人伐衛狄其稱人何也善累而後進之伐衛所以救齊也功近而德遠矣

公曹人邾人盟于曹南繒子會盟于邾己酉邾人
執繒子用之微國之君因邾以求與之盟人因己
以求與之盟己迎而執之惡之故謹而日之也用
之者叩其鼻以頰社也秋宋人圍曹衛人伐邢冬
會陳人蔡人楚人鄭人盟于齊梁亡自亡也洎於
酒淫於色心昏耳目塞上無正長之治大臣背叛
民爲寇盜梁亡自亡也如加力役焉洎不足道也
梁亡鄭弃其師我無加損焉正名而已矣梁亡出

惡正也鄭弃其師惡其長也
廿年春新作南門作爲也有加其度也言新有故
也非作也南門者法門也夏郟子來朝五月乙巳
西宮災謂之新宮則近爲禰宮以謚言之則如䟽
之然以是爲閔宮也鄭人入滑秋齊人狄人盟于
邢邢爲主焉爾邢小其爲主何也其爲主乎救齊
冬楚人伐隨隨國也
廿有一年春狄侵衛宋人齊人楚人盟于鹿上夏

大旱旱時正也秋宋公楚子陳侯蔡侯鄭伯許男
曹伯會于雩執宋公以伐宋以重辭也冬公伐邾
楚人使冝申來獻捷捷軍得也其不曰宋捷何也
不與楚捷於宋也十有二月癸丑公會諸侯盟于
薄會者外為主焉爾釋宋公外釋不志此其志何
也以公之與之盟目之也不言楚不與楚專釋也
廿有二年春公伐邾取須句夏宋公衛侯許男滕
子伐鄭秋八月丁未及邾人戰于外陘內諱敗舉

其可道者也不言其人以吾敗也不言及之者為
內諱也冬十有一月己巳朔宋公及楚人戰于泓
宋師敗績日事遇朔曰朔春秋廿有四戰未有以
尊敗乎卑以師敗乎人者也以尊敗乎卑以師敗
乎人則驕其敵襄公以師敗乎人而不驕其敵何
也責之也泓之戰以為復雩之恥也雩之恥宋襄
公有以自取之伐齊之喪執滕子圍曹為雩之會
不顧其力之不足而致楚成王成王怒而執之故

曰禮人而不答則反其敬愛人而不親則反其仁
治人而不治則反其知過而不改又之是謂之過
襄公之謂也古者被甲嬰冑非以興國也則以征
無道也豈曰以報其恥哉宋公與楚人戰于泓水
之上司馬子反曰楚衆我少鼓險而擊之勝無幸
焉襄公曰君子不推人危不攻人厄須其出旣出
旌亂於上陳亂於下子反曰楚衆我少擊之勝無
幸焉襄公曰不鼓不成列須其成列而後擊之則

衆敗而身傷焉七月而死倍則攻敵則戰少則守
人之所以爲人者言也人而不能言何以爲人言
之所以爲言者信也言而不信何以爲言信之所
以爲信者道也信而不道何以爲道道之貴者時
其行勢也

十有三年春齊侯伐宋圍閔伐國不言圍邑此其
言圍何也不正其以惡報惡也夏五月庚寅宋公
茲父卒茲父之不葬何也失民也其失民何也以

其不教民戰則是弃其師也為人君而弃其師其民孰以為君哉秋楚人伐陳冬十有一月杞子卒
十有四年春王正月夏狄伐鄭秋七月冬天王出居于鄭天子無出出失天下也居者居其所也雖失天下莫敢有也晉侯夷吾卒

十有五年春王正月丙午衛侯燬滅邢燬之名何也不正其伐本而滅同姓也夏四月癸酉衛侯燬卒宋蕩伯姬來逆婦婦人既嫁不踰竟宋蕩伯姬

來逆婦非正也其曰婦何也緣姑言之之辭也宋殺其大夫其不稱名姓以其在祖之位尊之也秋楚人圍陳納頓子于頓納者內弗受也圍一事也納一事也而遂言之蓋納頓子者陳也苑衛文公冬十有二月癸亥公會衛子莒慶盟于洮莒無大夫其曰莒慶何也以公之會目之也
十有六年春王正月己未公會莒子衛甯速盟于向公不會大夫其曰甯速何也以其隨莒子可以

言會也。齊人侵我西鄙，公追齊師至舊，弗及。人微者也。侵淺事也。公之追之，非正也。至舊，急辭也。弗及者，弗與也。可以及而不敢及也。其侵也曰人，其追也曰師。以公之弗及大之也。弗及，內辭也。夏，齊人伐我北鄙，衛人伐齊。公子遂如楚，乞師。乞，重辭也。何重焉？重人之死也。非所乞也。師出，不必反戰，不必勝，故重之也。秋，楚人滅麇，以麇子歸，麇國也。不曰微國也。以歸，猶愈乎執也。冬，楚人伐宋，圍閔。

伐國不言圍邑，此其言圍何也？以吾用其師，曰其事也。非道用師也。公以楚師伐齊，取穀，以者不以者也。民者君之本也。使民以其死，非其正也。公至自伐齊，惡事不致，此其致之何也？危之也。廿有七年春，杞子來朝。夏六月庚寅，齊侯昭卒。秋八月乙未，葬齊孝公。乙巳，公子遂帥師入杞。冬，楚人陳侯、蔡侯、鄭伯、許男圍宋。楚人者，楚子也。其曰人，何也？人，楚子所以人諸侯也。其人諸侯，何也不。

正其信夷狄而伐中國也十有二月甲戌公會諸侯盟于宋
廿有八年春晉侯侵曹晉侯伐衛再稱晉侯忌也
公子買戍衛不卒戍刺之先名後刺殺有罪也公
子啓曰不卒戍者可以卒也可以卒而不卒譏在
公子也刺之可也楚人救衛三月丙午晉侯入曹
執曹伯畀宋人入者內弗受也日入惡入者也以
晉侯而斥執曹伯惡晉侯也畀與也其日入何也

不以晉侯畀宋公也夏四月己巳晉侯齊侯宋師
秦師及楚人戰于城濮楚師敗績楚殺其大夫得
臣衛侯出奔楚五月癸丑公會晉侯齊侯宋公蔡
侯鄭伯衛子莒子盟于踐土諱會天王也陳侯如
會如會外乎會也於會受命也公朝于王所朝不
言所言所者非其所也六月衛侯鄭自楚復歸于
衛自楚楚有奉焉爾復者復中國也歸者歸其所
也鄭之名失國也衛元咺出奔晉陳侯款卒秋杞

伯姬來公子遂如齊冬公會晉侯宋公蔡侯鄭伯
陳子莒子邾子秦人于溫諱會天王也天王守于
河陽全天王之行也為若將守而遇諸侯之朝也
為天王諱也水北為陽山南為陽溫河陽也壬申
公朝於王所朝於廟禮也於外非禮也獨公朝與
諸侯盡朝也其日以其再致天子故謹而日之主
善以內日惡以外言曰公朝逆辭也而尊天子會
于溫言小諸侯溫河北地以河陽言之大天子也

日繫於月月繫於時壬申公朝于王所其不月失
其所繫也以為晉文公之行事為已慎矣晉人執
衛侯歸之于京師此入而執其不言入何也不外
王命於衛也歸之于京師緩辭也斷在京師也衛
元咺自晉復歸于衛自晉晉有奉焉爾復者復中
國也歸者歸其所也諸侯遂圍許遂繼事也曹伯
襄復歸于曹復者復中國也天子免之因與之會
其曰復通王命也遂會諸侯圍許遂繼事也

廿有九年春介葛盧來介國也葛盧微國之君未
爵者也其曰來卑也公至自圍許夏六月公會王
人晉人宋人齊人陳人蔡人秦人盟于翟泉秋大
雨雹冬介葛盧來
卅年春王正月夏狄侵齊秋衛殺其大夫元咺稱
國以殺罪累上也以是爲訟君也衛侯在外其以
累上之辭言之何也待其殺而後入也及公子瑕
公子瑕累也以尊及卑也衛侯鄭歸于衛晉人秦

人圍鄭介人侵蕭冬天王使宰周公來聘天子之
宰通于四海公子遂如京師遂如晉以尊遂乎卑
此言不敢叛京師也
卅有一年春取濟西田公子遂如晉夏四月四卜
郊不從乃免牲猶三望夏四月不時也四卜非禮
也免牲者爲之緇衣熏裳有司玄端奉送至于南
郊免牛亦然乃者亡乎人之辭也猶者可以已之
辭也秋七月冬杞伯姬來求婦婦人既嫁不踰竟

杞伯姬來求婦非正也狄圍衛十有二月衛遷於
帝丘帝丘在濮陽也十有二月衛遷於
帝丘帝丘在濮陽也十有二月衛遷於
十有二年春王正月夏四月己丑鄭伯捷卒衛人
侵狄秋衛人及狄盟冬十有二月己卯晉侯重耳
卒重耳在秦也十有三年春王正月秦人入滑滑國也齊侯使國
歸父來聘夏四月辛巳晉人及姜戎敗秦師于殽
不言戰而言敗何也狄秦也其狄之何也秦越千

里之險入虛國進不能守退敗其師徒亂人子女
之教無男女之別秦之爲狄自殽之戰始也秦伯
將龍衣鄭百里子與蹇叔子諫曰千里而襲人未有
不亡者也秦伯曰子之家木也拱矣何知師行百
里子與蹇叔子送其子而戒之曰女死必於殽之
巖陰之下我將尸女於是師行百里子與蹇叔子
隨其子而哭之秦伯怒曰何爲哭吾師也二子曰
非敢哭師也哭吾子也我老矣彼不死則我死矣

晉人與姜戎要而擊之殺匹馬倚輪無反者晉人者晉子也其曰人何也微之也何為微之不正其釋殯而主乎戰也癸巳葬晉文公曰葬危不得葬也狄侵齊公伐邾取訾樓秋公子遂帥師伐邾晉人敗狄于箕冬十月公如齊十有二月公至自齊乙巳公薨于小寢小寢非正也隕霜不殺草未可殺而殺舉重也可殺而不殺舉輕也李梅實實之為言猶實也晉人陳人鄭人伐許

春秋穀梁卷第五

春秋穀梁傳文公第六

范甯集解

元年春王正月公即位繼正即位正也二月癸亥
 日有食之天王使叔服來會葬葬曰會其志重天
 子之禮也夏四月丁巳葬我君僖公薨稱公舉上
 也葬我君接上下也僖公葬而後舉謚謚所以成
 德也於卒事乎加之矣天王使毛伯來錫公命禮

有受命無來錫命錫命非正也晉侯伐衛叔孫得
臣如京師衛人伐晉秋公孫敖會晉侯于戚冬十
月丁未楚世子商弒其君髡日髡之卒所以謹
商臣之弒也夷狄不言正不正公孫敖如齊
二年春王二月甲子晉侯及秦師戰于彭衙秦師
敗績丁丑作僖公主作為也為僖公主也立主喪
主於虞吉主於練作僖公主譏其後也作主壞廟
有時日於練焉壞廟壞廟之道易檐可也改塗可

也三月乙巳及晉虺父盟不言公虺父仇也為公
諱也何以知其與公盟以其日也何以不言公之
如晉所恥也出不書反不致也夏六月公孫敖會
宋公陳侯鄭伯晉士穀盟于垂斂內大夫可以會
諸侯自十有二月不雨至于秋七月歷時而言不
雨文不憂雨也不憂雨者無志乎民也八月丁卯
大事于大廟躋僖公大事者何大是事也著禘嘗
禘祭者毀廟之主陳于大祖未毀廟之主皆升合

祭于太祖躋升也先親而後祖也逆祀也逆祀則是無昭穆也無昭穆則是無祖也無祖則無天也故曰文無天無天者是無天而行也君子不以親親害尊尊此春秋之義也冬晉人宋人陳人鄭人伐秦公子遂如齊納幣

三年春王正月叔孫得臣會晉人宋人陳人衛人鄭人伐沈沈潰夏五月王子虎卒叔服也此不卒者也何以卒之以其來會葬我卒之也或曰以其

嘗執重以守也秦人伐晉秋楚人圍江雨蝨于宋外災不志此何以志也曰災甚也其甚奈何茅茨盡矣著於上見於下謂之雨冬公如晉十有二月己巳公及晉侯盟晉陽處父帥師伐楚救江此伐楚其言救江何也江遠楚近伐楚所以救江也四年春公至自晉夏逆婦姜于齊其曰婦姜為其禮成乎齊也其逆者誰也親逆而稱婦或者公與何其速婦之也曰公也其不言公何也非成禮於

齊也曰婦有姑之辭也其不言氏何也貶之也何
 為貶之也夫人與有貶也狄侵齊秋楚人滅江晉
 侯伐秦衛侯使甯俞來聘冬十有一月壬寅夫人
 風氏薨風氏薨於齊也
 五年春王正月王使榮叔歸含且贈含一事也贈
 一事也兼歸之非正也其曰且志兼也其不言來
 不周事之用也贈以早而含以晚三月辛亥葬我
 小君成風王使毛伯來會葬會葬之禮於鄙上夏

公孫敖如晉秦人入郟秋楚人滅六冬十月甲申
 許男業卒

六年春葬許僖公夏季孫行父如陳秋季孫行父
 如晉八月乙亥晉侯驩卒冬十月公子遂如晉葬
 晉襄公晉殺其大夫陽處父稱國以殺罪累上也
 襄公已葬其以累上之辭言之何也君漏言也上
 洩則下闇下闇則上龍耳且闇且龍耳無以相通夜姑
 殺者也夜姑之殺奈何曰晉將與狄戰使狐夜姑

爲將軍趙盾佐之陽處父曰不可古者君之使臣也使仁者佐賢者不使賢者佐仁者今趙盾賢夜姑仁其不可乎襄公曰諾謂夜姑曰吾始使盾佐女今女佐盾矣夜姑曰敬諾襄公死處父主竟上之事夜姑使人殺之君漏言也故士造辟而言詭辭而出曰用我則可不用我則無亂其德晉狐夜姑出奔狄閏月不告月猶朝于廟不告月者何也不告朔也不告朔則何爲不言朔也閏月者附月

之餘日也積分而成於月者也天子不以告朔而喪事不數也猶之爲言可以已也

七年春公伐邾三月甲戌取須句取邑不日此其日何也不正其再取故謹而日之也遂城郟遂繼事也夏四月宋公王臣卒宋人殺其大夫稱人以殺誅有罪也戊子晉人及秦人戰于令狐晉先蔑奔秦不言出在外也輟戰而奔秦以是爲逃軍也狄侵我西鄙秋八月公會諸侯晉大夫盟于扈其

曰諸侯略之也冬徐伐莒公孫敖如莒蒞盟蒞位也其曰位何也前定也其不曰前定之盟不日也八年春王正月夏四月秋八月戊申天王崩冬十月壬午公子遂會晉趙盾盟于衡雍乙酉公子遂會雒戎盟于暴公孫敖如京師不至復丙戌奔莒不言所至未如也未如則未復也未如而曰如不廢君命也未復而曰復不專君命也其如非如也其復非復也唯奔莒之爲信故謹而曰之也螽宋

人殺其大夫司馬司馬官也其以官稱無君之辭也宋司城來奔司城官也其以官稱無君之辭也來奔者不言出舉其接我也九年春毛伯來求金求車猶可求金甚矣夫人姜氏如齊二月叔孫得臣如京師京大也師衆也言周必以衆與大言之也辛丑葬襄王天子志崩不志葬舉天下而葬一人其道不疑也志葬危不得葬也日之甚矣其不葬之辭也晉人殺其大夫先

都三月夫人姜氏至自齊卑以尊致病文公也晉人殺其大夫士穀及箕鄭父稱人以殺誅有罪也鄭父累也楚人伐鄭公子遂會晉人宋人衛人許人救鄭夏狄侵齊秋八月曹伯襄卒九月癸酉地震震動也地不震者也震故謹而日之也冬楚子使荻來聘楚無大夫其曰荻何也以其來我褒之也秦人來歸僖公成風之襚秦人弗夫人也即外之弗夫人而見正焉葬曹共公

十年春王三月辛卯臧孫辰卒夏秦伐晉楚殺其大夫冝申自正月不雨至于秋七月歷時而言不雨文不閔雨也不閔雨者無志乎民也及蘇子盟于女栗冬狄侵宋楚子蔡侯次于厥貉十有一年春楚子伐麇夏叔彭生會晉郤缺于承匡秋曹伯來朝公子遂如宋狄侵齊冬十月甲午叔孫得臣敗狄于鹹不言帥師而言敗何也直敗一人之辭也一人而曰敗何也以衆焉言之也傳

曰長狄也弟兄三人佚害中國瓦石不能害叔孫
得臣最善射者也射其目身橫九畝斷其首而載
之眉見於軾然則何爲不言獲也曰古者不重創
不禽二毛故不言獲爲內諱也其之齊者王子成
父殺之則未知其之晉者也
十有二年春王正月邾伯來奔杞伯來朝二月庚
子子叔姬卒其曰子叔姬貴也公之母姊妹也其
一傳曰許嫁以卒之也男子廿而冠冠而列丈夫

卅而娶女子十五而許嫁廿而嫁夏楚人圍巢秋
滕子來朝秦伯使術來聘冬十有二月戊午晉人
秦人戰于河曲不言及秦晉之戰已亟故略之也
季孫行父帥師城諸及鄆稱帥師言有難也
十有三年春王正月夏五月壬午陳侯朔卒邾子
蘧降卒自正月不雨至于秋七月大室屋壞大室
屋壞者有壞道也譏不脩也大室猶世室也周公
曰大廟伯禽曰大室羣公曰宮禮宗廟之事君親

割夫人親舂敬之至也爲社稷之主而先君之廟
壞極稱之志不敬也冬公如晉衛侯會公于沓狄
侵衛十有二月己丑公及晉侯盟還自晉還者事
未畢也自晉事畢也鄭伯會公于棗
十有四年春王正月公至自晉邾人伐我南鄙叔
彭生帥師伐邾夏五月乙亥齊侯潘卒六月公會
宋公陳侯衛侯鄭伯許男曹伯晉趙盾癸酉同盟
于新城同者有同也同外楚也秋七月有星孛入

于北斗孛之爲言猶菑也其曰入北斗斗有環域
也公至自會晉人納捷菑于邾弗克納是郟克也
其曰人何也微之也何爲微之也長轂五百乘繇
地千里過宋鄭滕薛魯入千乘之國欲變人之主
至城下然後知何知之晚也弗克納未伐而曰弗
克何也弗克其義也捷菑晉出也繹且齊出也繹
且正也捷菑不正也九月甲申公孫敖卒于齊奔
大夫不言卒而言卒何也爲受其喪不可不卒也

其地於外也齊公子商人弒其君舍舍未踰年其
曰君何也成舍之爲君所以重商人之弒也商人
其不以國氏何也不以嫌代嫌也舍之不日何也
未成爲君也宋子哀來奔其曰子哀失之也冬單
伯如齊齊人執單伯私罪也單伯淫于齊齊人執
之齊人執子叔姬叔姬同罪也
十有五年春季孫行父如晉三月宋司馬華孫來
盟司馬官也其以官稱無君之辭也來盟者何前

定也不言及者以國與之也夏曹伯來朝齊人歸
公孫敖之喪六月辛丑朔日有食之鼓用牲于社
單伯至自齊大夫執則致致則名此其不名何也
天子之命大夫也晉卻缺帥師伐蔡戊申入蔡秋
齊人侵我西鄙其曰鄙遠之也其遠之何也不以
難介我國也季孫行父如晉冬十有一月諸侯盟
于扈十有二月齊人來歸子叔姬其曰子叔姬貴
之也其言來歸何也父母之於子雖有罪猶欲其

免也齊侯侵我西鄙遂伐曹入其郭

十有六年春季孫行父會齊侯于陽穀齊侯弗及盟弗及者內辭也行父失命矣齊得內辭也夏五月公四不視朔天子告朔于諸侯諸侯受乎禰廟禮也公四不視朔公不臣也以公為厭政以甚矣六月戊辰公子遂及齊侯盟于師丘復行父之盟也秋八月辛未夫人姜氏薨毀泉臺喪不貳事貳事緩喪也以文為多失道矣自古為之今毀之不

如勿處而已矣楚人秦人巴人滅庸冬十有一月宋人弑其君杵臼

十有七年春晉人衛人陳人鄭人伐宋夏四月癸亥葬我小君聲姜齊侯伐我西鄙六月癸未公及齊侯盟于穀諸侯會于扈秋公至自穀冬公子遂如齊

十有八年春王二月丁丑公薨于臺下臺下非正也秦伯罃卒夏五月戊戌齊人弑其君商人六月

癸酉葬我君文公秋公子遂叔孫得臣如齊使舉
上客而不稱介不正其同倫而相介故列而數之
也冬十月子卒子卒不日故也夫人姜氏歸于齊
惡宣公也有不待貶絕而罪惡見者有待貶絕而
惡從之者姪弟者不孤子之意也一人有子三人
緩帶一曰就賢也季孫行父如齊莒弒其君庶其

春秋穀梁卷第六

